



21.02.2011

Studija "Analiza opterećenja privrede u BiH": Uslovi u privredi neodrživi

Mladen Pandurević, direktor Udruženja poslodavaca u FBiH, rekao je da je nova studija "Analiza opterećenja privrede u BiH", koju je pripremilo to udruženje u saradnji s Asocijacijom poslodavaca BiH i uz finansijsku podršku Međunarodne organizacije rada, pokazala da tako velika davanja poslodavaca urazvoja i novog zapošljavanja kao u BiH, ne postoje nigdje u svijetu te da ih je nemoguće izdržati.

Na prezentaciji ove studije u Sarajevu, Pandurević je istaknuo da će svi koji su odgovorni za to kada vide nalaze iz analize morati poduzeti određene mjere da se situacija promijeni.

"U KS-u se, naprimjer, plaćaju natpisi, odnosno pilati i jarboli i ukoliko imate jedan takav pilat i tri jarbola plaćate između sedam i deset hiljada KM mjesečno, a recimo zakoni koji se odnose na državne praznike vas obavezuje da istaknete državnu zastavu za dan državnog praznika. Isto, naprimjer, neke male općine u FBiH, s nekoliko hiljada stanovnika, traže po osamsto do hiljadu KM naknade samo za isticanje firme, a ta naknada u općinama u Sarajevu je 40 posto jeftinija", kazao je Pandurević.

On je dodao da je u studiji dat pregled više od 90 posto opterećenja na privredu na državnom i entitetskim nivoima, kao i za Brčko Distrikt BiH te da je osobno, kao i oni koji su radili na pripremi studije, bio iznenađen šta sve plaćaju poslodavci.

"Ovaj projekt još nije završen tako da ćemo nastaviti s analizom kantonalnih opterećenja i opterećenja na općinskom nivou. Da bismo popravili stanje u privredi mislim da u naredne dvije godine trebamo rasteretiti za 10,5 posto privredu po osnovu doprinosa. Treba odmah sa 4,5 posto, pa u naredne dvije godine postepeno, da se ne ruši stabilnost vanbudžetskih fondova, a potreban je i jedan čitav set mjera za

poboljšanje likvidnosti", kazao je Pandurević.

Također je dodao da prevelika opterećenja na privredu i poslodavce sprječavaju nove investicije, a samim tim i novo zapošljavanje. S većim brojem zaposlenih bit će stabilniji vanbudžetski fondovi i budžeti, jer će veći broj zaposlenih plaćati doprinose i poreze, rekao je Pandurević.

Glavni pokazatelji pri izradi ove analize, po riječima autora doc.dr. Fuada Bajraktarevića, bili su podaci Direkcije za ekonomsko planiranje i Centralne banke BiH.

On je rekao da analiza pokazuje da je u BiH 20 posto samofinansirajućih zaposlenika koji sami plaćaju doprinose te da vlade moraju što prije poraditi da im se ta opterećenja smanje, istaknuvši da se tu, prije svega, misli na klastere.

Izrazio je uvjerenje da će ekonomska kriza vrlo vjerovatno ponovno pogoditi i BiH narednu godinu i dvije i da će Strategija razvoja BiH koja je, po njemu, vrlo dobro postavljena, morati pretrpjeti promjene, s obzirom na to da Svjetska banka najavljuje i neke promjene u evropskom bankarskom sistemu, a i kompletnom sistemu na svjetskom nivou.

Osim visokih doprinosa i porez na plaće, u analizi je, između ostalog, ukazano i na desetine plaćanja po raznim osnovama , od koji je većina na mjesečnom nivou, zatim na previsoke kamatne stope za privredu, rigorozne uvjete za dobijanje kredita poslodavcima i skuplje tarife komunalnih usluga.

Prezentaciji su prisustvovali predstavnici Parlamenta i Vlade FBiH, Sindikata BiH, privrednih komora, Vijeće stranih investitora u BiH, udruženja poslodavaca, Ekonomsko-socijalnog vijeća za teritoriju FBiH i drugi.